

- 1^r Wer leschen will eyns andern für
- 2^r Vnd brennen loßt syn eygen schür
- 3^r Der ist güt vff der narren lür



Syn selbs vergessen

- 1 Wer groß arbeyt vnd vngemach
- 2 Hat / wie er fürdere frömbde sach
- 3 Vnd wie eyns andern nutz er schaff
- 4 Der ist me dann eyn ander aff

5 So er nit jnn synr eygnen sach
 6 Lügt / das er flissig sy vnd wach
 7 Der narren büchlin billich lysßt
 8 Wer wiß ist / vnd syn selbs vergißt
 9 Dann der geordnete lieb will han
 10 Der sol an jm selbst vohen an
 11 Als ouch Terencius vermant
 12 Jch bin mir aller nächst verwant
 13 Eyn yeder lüg vor syner schantz
 14 Ee er sorg / wie eyn ander dantz
 15 Der will verderben ee dann zytt
 16 Der jm nit segt / vnd andern schnyt
 17 Vnd wer eyns andern kleydt mit flisß
 18 Süfert / vnd er das syn beschisß
 19 Wer leschen will eyns andern huß
 20 So jm die flamm schlecht oben vß
 21 Vnd brennt das syn jn alle macht
 22 Der hat vff syn nutz wenig acht
 23 Wer fürdern will eyns andern karr
 24 Vnd hyndern sich / der ist eyn narr
 25 Wer sich mit frömbder sach belad
 26 Vnd selbst versumbt / der hab den schad
 27 Wer sich des vber reden latt
 28 Dar vß jm spott vnd schad entstat
 29 Der mag die leng sich nit erwören
 30 Der narr erwysch jn by dem gören
 31 Mach wißheyt jnn mit schaden leren
 32 Dem lydt syn dott am hertsten an
 33 Den sunst erkennet yeder man
 34 Vnd er styrbt / vnd syn leben endt
 35 Das er sich selbst *nit* hatt erkennt

9 geordnete GW5046 GW5047] geordente GW5041 35 nit] fehlt GW5046 GW5047